

## DOMINGU V TEMPU KOMÚN – TINAN C

### Tema

Liturjia domingu ne'e nian lori ita atu refleto kona-ba ita-nia vokasaun: Maromak bolu ita hotu no husi Nia ita simu misaun ida ba mundu.

Iha *leitura dahuluk*, ita hetan deskrisaun kona-ba profeta ida nia vokasaun – Isaías. Ho modu simples, ita haree modelu kona-ba ema ida sensivel ba Maromak nia apelu sira no iha korajen atu aseita Maromak nia mandatu.

Iha *Evanjellu*, Lucas aprezena grupu ida eskolante sira-nian ne'ebé fahe ho Jezús sira-nia roo, simu Jezús nia proposta sira, hatene rekoñese Nia nu'udar sira-nia “Na’i”, aseita konvite atu sai “tiha-na’in ema sira-nian” no husik buat hotu atu tuir Jezús... Iha kuadru ne'e, ita rekoñese dalan ne'ebé sarani sira hetan bolun atu la'o tuir.

*Leitura daruak* propoin mai ita atu refleto kona-ba moris-hi'as: ne'e mak realidade ida ne'ebé tenke fó forma ba dixípulu nia moris no lori nia atu enfrenta lahó ta'uk kbiit sira injustisa no mate nian. Ho ninia asaun libertadora – ne'ebé kontinua Jezús nia asaun no renova ema no mundu – dixípulu hatene katak nia fó sasin kona-ba Kristu nia moris-hi'as.

### LEITURA I – Is 6,1-2a.3-8

Ita iha Jerusalém, maizumenus tian 740/739 mK. Isaías karik iha tinan 20 nune'e. Enkuantu nia iha hela Templu atu halo orasaun, nia deskobre katak Maromak bolu nia atu sai profeta. Testu haktuir mai ita deskoberta ne'e no Isaías nia resposta. Ita labele haree ba testu ida-ne'e nu'udar reportajen jornalística akontesimentu sira-nian, maibé apresentasaun teolójika esperiénsia interiór vokasaun nian.

Deskrisaun oioin hanesan tronu aas ne'ebé Na'i hatuur An, ninia hatais naruk ne'ebé hakonu Templu, “serafín sira” ka anju ho liras neen ne'ebé semu haleu no taka sira oin no ain, odamatan nakloke, ahi-suar – mak elementu simbóliku sura ne'ebé profeta uza atu hatudu Maromak nia kmanek boot no kbiit. Ne'e mak profeta nia perspetiva kona-ba Maromak ne'ebé bolu nia.

### MENSAJEN

Iha katekeze kona-ba esperiénsia vokasaun nian ida-ne'e, ita hetan pasu ruma ne'ebé ita sei halo rezumu badak de'it.

Uluknanai (vers. 1-5), Isaías haktuir momoos katak ninia vokasaun mak obra Jahwéh nian, Maromak kbiit-na'in no santu aas liu no dook husi ema nia realidade sala-na'in. Elementu literáriu típiku teofania nian (ta'uk, lian maka'as, ahi-suar) define kuadru típiku Maromak nia manifestasaun nian iha Testamentu Tuan: Maromak ida-ne'e mak hatudu an ba Isaías no konvoka nia ba Ninia servisu.

Iha fatin daruak (vers. 6-7), ita iha objesaun no purifikasaun. Profeta nia objesaun mak elementu típiku relatu sira vokasaun nian (haree Ex 3,11, ho Moisés nia bolun). Nia manifesta ema nia sentimentu ne'ebé, simu bolun husi Maromak ba misaun ida, konxiente kona-ba ninia limite sira no ninia indignidade (la merese), ka prefere kontinua iha ninia sikun hakmatek nian, hodi la kompromete an. “Purifikasaun” sujere katak indignidade no

limitasaun la'ós impedimentu ba misaun: Maromak nia eleisaun fó autoridade ba profeta, maski nia iha limite umanu sira.

Iha fatin datoluk, ita iha aseitasaun misaun porfeta nian. Ita fó atensaun ba ida-ne'e: Isafas oferese an maski ladauk hatene sá loos misaun ne'ebé entrega ba nia; halo nune'e nia manifesta ninia disponibilidade absoluta ba servisu Maromak nian.

Buat hotu haktuir iha ne'e mak dalan vokasaun ida ne'ebé loos.

## **LEITURA II – 1 Cor 15,1-11**

Bainhira kristianizmu to'o iha mundu gregu nia provoka xoke ho mentalidade no perspetiva kulturál. Ida-ne'e sai evidente liu iha ema Corinto sira-nia difikuldade atu aseita moris-hi'as husi mate.

Moris-hi'as husi mate ne'e fiar ida ema judeu sira-nia tanba sira haree ba ema iha ninia unidade; maibé sai problema sériu ba mentalidade grega. Tanba sá? Tanba kultura grega, ne'ebé hetan influénsia husi filozofia dualista (hanesan filozofia Plataun nian ne'ebé iha tempu ne'ebá sai moda) haree iha isin realidade negativa ida no iha klamar tealidade ideál no aas, nune'e lakohi simu moris-hi'as ema integrál nian. Oinsá mak isin – realidade materiál, isin nian, sensuál, ne'ebé hadadur klamar no impede nia atu sa'e ba mundu ideál, iha gregu sira-nia opiniaun – ba tuir klamar?

Ne'e mak problema ne'ebé ema Corinto sira-nian husu no Paulo buka hatán iha testu ida-ne'e.

### *MENSAJEN*

Paulo nia argumentu simples no klaru: loron ida ita, sarani sira, sei moris hi'as, basá Kristu moris hi'as ona.

Testu hahú ho evokasaun fórmula ida katekeze primitiva nian kona-ba kestaun ne'e. Paulo la inventa nia: nia tranzmite ho fidelidade absoluta katekeze ne'ebé nia simu.

Fórmula paulina, lalenok no modelu haklaken moris-hi'as iha tempu Kreda foin hahú, estrutura tuir tempu tolu: informasaun kona-ba faktu (mate/moris-hi'as), Sagrada Eskritura nia sasin, komprovasaun esperimentál kona-ba ne'e (hakoi/aparisaun). Komprovasaun mai husi elementu rua seluk.

Kona-ba sasin eskritura sira-nian, Paulo la temi testu Sagrada Eskritura ho modu diretu afavór ba ninia teze; maibé ita bele hanoin katak nia refere ba Is 53,8-12 (poema dahaat Servu Jahwéh nian) no ba Os 6,2, kona-ba sasin sira Jezús nia moris-hi'as nian. Paulo temi Jezús moris-hi'as nia manifestasaun neen: ba Pedro, ba sira Na'in Sanulu-resin-rua, ba ema liu atus lima, ba Tiago, ba apóstolu seluk no, ikusnian, ba Paulo rasik.

Sira la fó sasin kona-ba momentu resurreisaun nian, maibé esperiénsia kona-ba Jezús ne'ebé kontinua moris liutiha ninia mate. Na'i moris-hi'as sai presente iha ema sira-ne'e nia vida no, nune'e, Nia sai objetu haklaken nian no fiar nian. Tanba ne'e, ko'alia kona-ba Jezús nia moris-hi'as, ita la ko'alia kona-ba “faktu istóriku” ida hodi hanoin katak “faktu istóriku” mak buat ne'ebé ema ida bele relata kona-ba pormenór hotu. Kristu nia moris-hi'as mak faktu réal ida, maibé tempu hanesan sobrenaturál no meta-istóriku (hakat liu istória), buat ruma ne'ebé ultrapasa ho modu kompletu kategoria umana sira espasu no tempu nian, atu bele tama iha órbita fiar nian. Ne'e mak buat ruma siénsia istórika labele demonstra, tanba korresponde ba esperiénsia ida fiar nian. Buat ne'ebé, istorikamente ita bele komprova, mak eskolante sira-nia transformasaun inkrikel, ne'ebé husi ema ta'uk-teen, nakonu ho frustrasaun no kobardia, sira nakfilak ba ema haklaken-na'in aten-barani nian, sasin Jezús ne'ebé moris-hi'as. Aleinde ne'e, resurreisaun mak faktu ida ne'ebé akontese ona no kontinua akontese; nia

kontinua iha ninia efikásia primitiva, kontinua iha kapasidade atu konverte iha ema foun sira ne'ebé aseita Jezús liuhusi fiar. Komunidade sarani simu konvite atu halo deskoberta ida-ne'e, hahú husi Eskritura sira, husi Espíritu no husi moris foun rasik ne'ebé kontinua buras iha sarani sira.

## **EVANJELLU – Lc 5,1-11**

Ita iha Galileia, iha inísiu Jezús nia ministériu nian, Tempu ruma liubá nia apresenta ninia programa iha sinagoga Nazaré nian nu'udar anúnsiu Liafoun Di'ak nian ba kiak sira no proposta libertasaun nian ba ema dadur sira... Agora, komesa nota rezultadu dahuluk Jezús nia atividade nian: komesa forma hale'u nia grupu ida ema sira nian ne'ebé sensível ba proposta salvaun no tuir Jezús.

### *MENSAJEN*

Testu ohin mak katekeze ida ne'ebé buka apresenta koordenada fundamentál sira identidade sarani nian: katak sá sai sarani? Oinsá tuir Jezús? Sá mak implikasaun mai husi tuir Jezús? Sai sarani mak, uluknanai, horik ho Jezús “iha roo hanesan” (haree vers. 3). Husi roo ne'e (komunidade sarani), mak Jezús nia Liafuan dirije ba mundu, hodi propoin ba ema hotu libertasaun (“Nia tur tiha iha roo laran, hodi hanorin ema sira”).

Iha fatin daruak, sai sarani katak, rona Jezús nia proposta, halo buat ne'ebé Nia dehan, kumpre ninia indikasaun sira, soe dai ba tasi laran (vers. 4-5). Dala ruma, Jezús nia proposta sira la tuir ema nia hanoin, la tuir lójika, la iha koerénsia, ridíkula; maibé presiza konfia nia ho modu inkondisionál, saran an iha nia liman laran no kumpre ninia indikasaun ida-idak (“tan Ita mak dehan, ha'u sei soe duni dai” – vers. 5).

Iha fatin datoluk, sai sarani katak, rekoñese Jezús nu'udar “Na'i” (vers. 8): ne'e mak buat ne'ebé Pedro halo, bainhira komprende katak Jezús nia proposta fó moris no fekundidade ba ema hotu. Títulu “Na'i” (iha gregu, “kyrios”) mak títulu ne'ebé comunidade sarani dahuluk fó ba Jezús moris-hi'as, hodi rekoñese iha Nia “Na'i” ne'ebé prezide mundu no istória.

Iha fatin dahaat, sai sarani katak, aseita misaun ne'ebé Jezús propoin: sai tiha-na'i ema nian (vers. 10). Atu komprende liafuan ne'e nia signifikadu, ita tenke hanoin “tasi” nia signifikadu iha judeu nia mentalidade: nia mak fatin monstru/balada fuik sira-nian, iha ne'ebé espíritu aat no kbiit demóniu sira-nian hela bá ne'ebé buka atu na'ok ema nia moris no ksolok. Dehan katak dixípulu sira sai “tiha-na'in ema nian” signifika katak sarani nia misaun mak kontinua Jezús nia obra libertadora afavór ba ema, hodi liberta ema husi buat ne'ebé na'ok nia moris no ksolok. Katak salva ema ne'ebé mate mout iha tasi opresaun nian, egoíзму nian, terus nian, ta'uk nian – forsa demóniu nian ne'ebé impede ema nia ksolok.

Ikusnian, sai sarani katak, husik buat hotu no tuir Jezús (vers. 11). Aluzaun kona-ba hamamuk an tomak husi eskolante nia parte mak típiku Lucas nain (kf. Lc 5,28;12,33;18,22): Lucas espresa katak laran-luak no saran-an totál tenke sai sinál distintivu comunidade sarani nian no sira ne'ebé tuir Jezús.

Pedro nia papél boot iha ne'e hakarak dehan katak comunidade Lucas nian mak comunidade ida ho estrutura, ne'ebé rekoñese Pedro nu'udar “portavós” no animadór mahuluk Jezús nia comunidade nian ne'ebé he'an iha tasi istória nian.